

# Treis plazzas da golf tonschan

Sursaissa desista pil mument dalla piazza da golf a Dachli

DA GIUSEP VENZIN / ANR

■ **Dapi gleiti diesch onns ei la piazza da golf e temps liber Dachli en discussiun. La piazza sill'altezia da 1200 tochen 1400 meters sur mar cun panorama tochen sigl Alpsu ei era dapi ogt onns el plan directiv regional.** Il siemi d'ina atgna piazza da golf exista denton gia dapi varga 30 a Sursaissa. Quei siemi daventa pil mument negina realitad. Sco il president dall'uniun dils promoturs dalla piazza *Fabio Bianchi* ha communicau desista l'uniun pil mument dalla realisaziun per evitar ulteriur squetsch sillas treis plazzas da golf existents Breil, Sagogn-Schluein e Sedrun/Selva. Sursaissa hagi in project da golf preparaus per la damonda da baghegiar che sappi vegnir realisaus enteifer cuort temps – priu che la situaziun economica semidi.

## Negina sorpresa

La comunicaziun da Fabio Bianchi ei negina sorpresa. La davosa novitad ella pagina d'internet [www.dachli.ch](http://www.dachli.ch) – la pagina ufficiale dalla uniun dils promoturs – datescha dil matg avon tschun onns. Lu era l'uniun secunvegnaida cullas uniuns digl ambient da realisar la piazza da golf schi ecologic sco pusseivel. Cuort avon havevan ils vischins da Sursaissa approbau la revisiun dalla planisaziun locala senza cuntervusch. Sco proxim pass era la damonda da baghegiar al cantun previus. Per survegnir il consentiment dil cantun duvrava l'uniun dils promoturs denter auter la segirtad finanziala cul mussament d'in cert diember da commembers. Sco l'uniun fa fatg da saver avon tschun onns haveva ella la ferma finamira da satisfar allas pretensius dil cantun. Avon tschun onns ei era igl ar-



La realisaziun dalla piazza da golf a Sursaissa ei sistida. Per con ditg ei aunc incert.

FOTO P. DE JONG

chitect da golf *John Chilver-Stainer* sefatschentaus culla planisaziun en detagl.

Ils promoturs dalla piazza han prestau bia lavur preparatoria. Las contractivas culs possessurs dil terren havevan pretendiu quei engaschi. Era golf ei vegniu dau a Sursaissa – quei denton igl unviern 2002 sin neiv. La concorrenza da promozium dil Cup Dachli ha giu liug igl uost avon siat onns a Selva.

## Golf ed aventura

La piazza ella regiun da Sursaissa e Mundaun dueva daventar dapli ch'ina piazza da golf. Previu era sper la piazza da golf in center d'aventuras cun ina piazza da minigolf cun elements dalla historia dils Gualsers, in bein puril cun animals periclitai dall'extincziun, in plaz da termagiar per affons cun ballabeinas, tuors da reiver e ruschnas, ina senda

ecologica ed ina piazza per sports da trend sco inline-skate. La casa dil club cun ustria dueva formar il center dall'entira purschida ed integrar ella vendita products dalla regiun. Dacuort ha ina grupp d'interess culla menadra da Sursaissa Turissem *Antonia Tschuor* presentau in niev concept per ina piazza d'aventuras a Miranigia. Quella piazza calculada cun cuosts da varga sis milliuns francs

concurrans la purschida entuorn la piazza da golf.

## 300 commembers

Era per *Paul Duff* da Mustér ei la sistida a Sursaissa negina sorpresa e sco el di actualmein era buca da disavantatg. Ei seigi semussau che treis plazzas tonschien per formar ina regiun da golf. Cun dapli plazzas creschi la tensiun alla tscherca da novs commembers. Paul Duff ei president dil Club da golf Sedrun e coordinescha las acziuns dalla Regiun da golf Surselva. Siu club dumbra actualmein 300 commembras e commembers e sco el di drovi 280 tochen 350 per saver finanziar ina piazza da tala grondezia: «Per engrondir la piazza sin 18 ruosnas drovi dapli commembers ed in augment dalla contribuziun annuala.»

## Pli precauts

«Nus lein baghegiar la piazza da golf sche ton la realisaziun sco era il menaschi ein garanti», di Fabio Bianchi. L'uniun dils promoturs dumbri rodund tschien commembers, l'acquiriziun da commembers per la piazza da golf seigi mai succedida ed aschia sappi el buca dir cons commembers ch'ei dess. Per Fabio Bianchi ei la sistida negina disgrazia. El argumentescha quella era culla situaziun economica actuala e manegia che las treis plazzas existents vegnien a sentir la crisa economica. Il president dall'uniun dil promoturs ei menader dalla fatschenta da baghegiar Bianchi SA a Sursaissa. La realisaziun dalla piazza da golf ei per el ina promozium turistica. Quella promozium succeda vina- von: «L'uniun dils promoturs dalla piazza da golf sustegn la grupp d'interess per la piazza d'eveniments a Misnenga.»

## ARTG PERSONAL

(anr/gv) **Scola mercantila Surselva:** Il venderdis vargau ha la Scola mercantila Surselva saviu undrar pliras scolaras e plirs scolar per lur prestaziuns excellentas als examens. *Curdin Bapst* da Luven ha terminau la scola media mercantila culla nota 5,7. Cun 5,4 han *Mauro Caduff* da Glion ed *Ursin Hüppin* da Mustér terminau ils examens ella medema partiziun. Culla nota 5,4 han era *Corina Maissen* da Trun e *Nicole Solèr* da Pitasch finiu ils examens sco employadas da commerci en detagl. In 5,2 han

tschun absolvents dalla scola contonschiu als examens finals. *Adrian Derungs* da Camuns ha terminau cun quella nota la maturitad professiunala e *Simona Giossi* da Rueras ils examens d'empredissadi d'employada mercantila profil E. Medemamein cun la nota 5,2 han *Sarah Candrian* da Sagogn, *Simona Casaulta* da Val e *Simona Caviezel* da Vrïn terminau igl empredissadi d'employada mercantila ed acquistau la maturitad professiunala mercantila profil M.

## Far kino cun energia solara

Sagogn muossa in film cun la tecnica da «Cinema Solaire»

■ (anr/snc) **Per l'endischavla gada presenta il kino open air a Sagogn in film sut tschiel aviert. Uonn vegn l'energia per mussar il film denton buca ord la bescla da contact, mobein dil sulegl. Il «Cinema Solaire» ei ina nova metoda da mussar films cun energia solara.** La tecnica da «Cinema Solaire» ei sempla: Duront il di vegni arcunau energia dil sulegl cun dus panels solars e quell'energia rimnada sa vegnir duvrada la sera d'in projectur da film. Il «Cinema Solaire» ha premiera el Grischn, quei a caschun digl endischavel kino open air che ha liug ils 18 da fenadur a Sagogn. «Per saver luvrar cun 'Cinema Solaire' sto ei esser bialaura», di *Cornelia Meyer-Cavelti*, ina dallas organisaturas dil kino open air a Sagogn. Sch'ins sa numnadamein buc arcunar avunda energia dil sulegl duront il di, lu dat ei buc avunda forza per saver mussar il film la sera. «Sch'ei plova, lu vegn il film mussaus ella halla da scola da Sagogn», manegia *Cornelia Meyer-Cavelti*. Il kino hagi denton liug da tutt'aura.

## Dus pioniers

«Cinema Solaire» ei in kino purtabel che funcziunescha cun energia dil sulegl. Quel possibilitescha da mussar films en loghens tut specials sco per exempel sin in plaz da scola ni egl uaul. Igl entir equipament pil kino ha numnadamein plaz en dus cars annex per velos. Igl element principal dil «Cinema Solaire» ei igl accumulatur da glisch. Leu vegn l'energia dil sulegl arcunada duront il di. Per mussar in film da duas tochen treis uras sto ins rimnar in entir di energia solara.

L'idea da «Cinema Solaire» deriva da *Reto Schmid* da Bienna e da *Christof Seiler* da Zug. Ils dus umens han inventau il «Cinema Solaire» a caschun d'in survetsch civil



**Cornelia Meyer-Cavelti e Claudio Camathias dil comite d'organisaziun speran sin in di sulegl per lur kino open air a Sagogn.** FOTO S. CAMINADA

nua ch'els han luvrau en ina grupp cun giuvenils. Ensem cun giuvenils han els fatg patratgs davart in futur ecologic e giu l'idea pil «Cinema Solaire». Cun lur project han els retschert igl onn vargau il premi solar.

## Kino per l'entira famiglia

Il kino open air a Sagogn vegn presentaus dall'uniun «Pro Sagogn». «L'idea ei da far ina sera per l'entira famiglia e da mussar in film legher per grond e pign», di *Cornelia Meyer-Cavelti*. Il film vegn mussaus en in format da 16 mm, in aschinunau format

per film stretg. Ils dus iniziants *Reto Schmid* e *Christof Seiler* lavuran mo cun films el format da 16 mm. «Els han presentau a nus ina gliesta da tut ils films ch'els san projectar cun 'Cinema Solaire', aschia essan nus sedecidi per la cumedia «Tage wie dieser» cun *George Clooney* e *Michelle Pfeiffer*», di *Cornelia Meyer-Cavelti*. Ils dus iniziants arrivan in di avon la presentaziun dil film cun lur equipament dil «Cinema Solaire». La sonda duront il di vegni lu arcunau l'energia e la sera allas 19.30 entscheiva il kino open air silla piazza da scola a Sagogn. L'entrada ei libra.

## TALUN D'EMPUSTAZIUN

### LA QUOTIDIANA

Jau abunesch *La Quotidiana*

2 mais frs 25.– (abunament d'empova d'ina gia)  6 mais frs 86.–

12 mais frs 163.–  24 mais frs 293.–

Num \_\_\_\_\_

Prenum \_\_\_\_\_

Adressa \_\_\_\_\_

NP/Lieu \_\_\_\_\_

Data \_\_\_\_\_ Suttascripziun \_\_\_\_\_

Tel.-nr. \_\_\_\_\_

P. pl. trametter a:

Südstschweiz Presse AG, servetsch d'abunaments, Via da la Caserna 1, 7007 Cuira

Empustaziun telefonica: 081 255 55 00